

楊襄毅公本兵疏議

楊襄毅公本兵疏議卷之一

覆監察御史徐敦奏責成浙直等處巡按御

軍紀功總督等官亟勦倭寇疏

兵部尚書臣楊博等謹

題爲海寇猖獗日甚地方十分危急懇乞

聖明選差監軍官員酌處撫臣信地以肅人心以期勦平
事職方清吏司案呈奉本部送兵科抄出南京江西
道試監察御史徐敦奏奉

聖旨兵部看了來說欽此抄出送司卷查先該河南道監
察御史錢鯨題爲陳末議以固海防以殄滅倭夷事

內一款差紀功以肅軍政該本部覆議得

國家凡遇用兵例差科道官各一員前去紀功凡以肅軍容而防奸弊也今日江南之事苦於官多困於供億極矣況地連三省寇之往來無常而用兵戰守亦非歲時可議遽罷也使差官久駐地方恐未爲便但本官痛恨各官壅蔽故欲專差科道以稽查其實意非不美合無另請

勅書一道行南直隸浙江福建各巡按御史悉照本官所議嚴行糾察以警官頑等因奉

聖旨准議欽此已經通行欽遵去後今該前因查呈到部

看得南京江西道試監察御史徐敦具奏前因極言倭寇猖獗地方危急數陳勦平之略大槩有二其一欲差科道官監軍紀功其二欲將浙江巡撫都御史移駐福建漳泉反覆辯析無非因倭奴驕縱之極憤兵威積怯之久其意甚善其論甚詳但科道監軍紀功一節先該御史錢鯨建議已經本部覆奉

欽依另請

勅書齎赴各該巡按御史嚴加糾察難以別議外至於福建漳泉雖稱淵藪之地而浙江嘉湖久罹剝膚之災即今賊勢方張兵力新集急則治標浙江之巡撫勢

難輕動緩則治本福建之料理似亦當先合候

命下備咨都察院馬上差人齎文交與南直隸浙江巡按御史即便遵照

勅諭事理監軍紀功不許徇情蔽護其漳泉經略保甲控制要害事宜仍行福建巡按御史嚴督守巡海道府州縣等官加意舉行賊果勦平有效并論福建諸臣之功賊如滋蔓罔功併治福建諸臣之罪再照自有倭患以來不苦於不戰而苦於無可戰之兵不苦於無兵而苦於少知兵之將即如山東民兵非不驍健可用但以將領非人調度失策遂至一敗塗地不可

救藥即今狼兵已到正屬決戰之時當思臨事之懼
若使督撫諸臣不以覆轍爲戒輕易調弄地方安危
在此一舉伏望

皇上天語丁寧總督官張經巡撫官李天寵周琬毋惑於
人言毋狃於己見必使主客官兵人情地利一一熟
貫於胸中戰期於必勝方爲進勦之圖守期於必固
毋爲輕率之計仍須再三申明賞規功成之日在客
兵則錄其奮勇敢憤之功在主兵則錄其哨探嚮導
之功彼此協力不相携二庶幾人心振勵慰

九重眷顧之懷掃蕩有期各一方倒懸之望如督撫各懷

意見不肯同心或當戰不戰或不當戰而戰阻撓掣肘致誤機宜聽巡按御史從重查叅

國典具存臣等亦不敢重自依違以悞大計嘉靖三十四年四月初二日題奉

聖旨是欽此

覆議裁革山東河南前營民兵徵銀疏

題爲稽實政以責成功以均節財用事職方清吏司案呈奉本部送兵科抄出巡撫山東等處地方都察院右副都御史劉采題奉

聖旨兵部知道欽此欽遵查覆間又准河南布政使司咨

呈前事等因通送到司案呈到部看得巡撫山東都御史劉采題稱欲將前營民兵每名徵解工食三十兩自嘉靖三十四年夏季爲始每年二次解部本非常額暫行二年另奏處豁及行總督劄遼保定衙門免行徵調戍邊後營民兵二千名步隊一千名照舊存留聽臣訓練每遇防秋隨臣駐劄臨德等處聽候入衛前營步隊一千名併入臨清防守其統領民兵叅將革回別用德州兵備照舊存留及據河南布政使司咨呈內稱河南民兵每名每歲軍裝工食銀三十兩今派三十六兩民力不堪乞要止徵三十兩

各一節爲照山東河南二處民兵原因庚戌虜患之後漸次增設無非大振威聲防護畿甸之意三四年來工食之費用爲多閭閻之愁苦特甚始而選民爲兵猶爲有名既而免兵徵銀殊爲無謂在山東則欲止徵二年在河南則欲量減六兩其情甚切其言有據若使得寬一分小民自受一分之賜所據兩營民兵不止前營該罷雖後營亦當裁省但薊鎮今歲虜患比之往歲不同審時度勢冷口白羊之調恐難遽已及查得二處巡撫此外再無可領之兵難以責其照舊入援况山東河南相去薊鎮往返幾三千里地

方隔遠未免緩不及事相應通行議處合候

命下備行山東都御史劉采河南都御史鄒守愚各將原
議民兵銀兩免其徵解以蘇民困其後營民兵三千
臨期各令副使叅將統領聽總督侍郎王忬徑自徵
調分布防邊稍候虜警緩日本部另行議奏劉采鄒
守愚防秋之日止在本處嚴加備禦雖有警報不必
前來策應嘉靖三十四年四月初九日題奉

聖旨是欽此

開陳防守薊鎮事宜責成邊臣疏

題爲預計虜情廣集兵糧以尊

京師以安畿甸重地事職方清吏司案呈近該總督劉
遼侍郎王忬揭稱朵顏諸夷相繼從虜千里邊關俱
與大虜爲鄰今秋事勢迥異往年若不大破常格廣
集兵糧恐有東西受敵之患本職昨疏請兵亦尚未
勾分布今應作速會議一面催調陝西人馬四枝兼
程入關以便調度等因查得先奉本部送兵科抄出
該總督侍郎王忬題爲虜勢猖獗懇乞

天恩挑選精壯邊兵以備急調分布截殺事內稱欲於大
同選兵三千延綏募兵一千并將宣大遊擊楊世臣
胡吉兵馬再加挑選務足三千之數見在延綏陳言

一枝暫留防秋破格發銀給賞等因又該提督趙卿題爲審事機預設備增兵禦虜以防未然以固根本事內稱欲再調邊兵四枝專聽總督調遣以防薊鎮原調陝西四枝親自統領專護京師

陵寢等因俱奉

聖旨兵部知道欽此又該巡撫宣府都御史劉廷臣題爲計處增脩阨塞以預防虜患事內稱欲將懷來大山口逶迤起伏至隆永抵四海冶黃花鎮接界鎮南墩一帶隘口借支官銀及時脩理等因奉

聖旨戶兵二部知道欽此又該巡撫山西都御史王崇題

爲傳報賊情整兵聽援事內稱欲將老營堡北樓口
遊兵應否應援薊鎮早爲定議等因奉

聖旨該部知道欽此欽遵通抄送司呈乞一併查議案呈
到部臣等看得蠢茲醜虜自嘉靖二十九年潰關之
後無日不垂涎薊鎮以耳目之所覩記三十三年二
月則一窺河坊九月則再犯古北三十四年二月則
一犯馬蘭三月則再窺古北仰仗

聖皇在上玄威震疊或力戰大挫其鋒或不戰自屈其兵
或乍進即遭其衄或欲犯先伐其謀神功聖德百
萬生靈不勝慶忭但今秋之事虜既積念日久必求

一逞委於往歲不同觀其收把總伯言帖忽思諸部則撤我古北之藩籬收流河諸部則撤我馬蘭之藩籬收影克脫力諸部則撤我冷口喜峰之藩籬千里邊關與虜爲鄰誠如總督侍郎王忬所論臣等竊惟今之所以重薊鎮者非爲薊鎮實爲京師故京師四方之極

君父在上元氣腹心不可不爲深長之慮以故臣等愚見先以尊京師爲主而尊京師之要固非城外列營城門列兵徒爲文具而已古北石塘第一緊要則亟當議守其次則當守馬蘭次則當守黃花居庸橫鎮鎮

邊次則當守喜峰冷口次則當守金水馬水紫荆倒
馬蓋密邇京師則虜患剝膚漸遠京師則虜患剝床
先後緩急之序不得不然臣等謹將應行事宜叅酌
諸臣之議列款上陳極知踈昧不協機宜待罪本兵
與有脩攘之責不敢緘默伏望

皇上俯賜采覽勅下遵行仍乞

天語丁寧總督王忬許論巡撫吳嘉會文希淳劉廷臣蘇
志臯王崇齊宗道各將防秋應議事件查照往年舊
規以次議奏庶幾群策群力交相效用足爲先事之
防不致後時之失矣嘉靖三十四年四月十四日題

奉

聖旨這所議防守薊鎮事宜著總督鎮巡官加意幹理不許怠視其餘依擬行欽此

一議添調邊兵臣等議得薊鎮設立總督兼調遼保陝西宣大人馬合力防守原是借股肱之力爲腹心之助庚戌之後調兵多至二十四枝以後漸次議掣去歲見調者遼東遊兵三枝軍門標下遼兵一千延綏二枝固原一枝寧夏一枝山東河南各一枝保定遊兵二枝民兵一枝軍門標下保兵一千宣大遊兵各一枝而白羊口大水峪曹家寨遊兵不在此數若

使各兵果皆精強一人一馬可用自亦足勾戰守但
調來之兵問其名則有問其實則無所以總督侍郎
王忬又欲選調大同邊兵三千本官近日巡撫彼中
頗得士心兵將貴於相識似應依其所擬合無本部
選差司屬官一員前去該鎮會同巡撫都御史齊宗
道總兵官焦澤并守巡兵備道於大同左右威平等
衛及得勝鎮羌高山等極邊城堡不分正奇遊援但
係慣戰精勇軍人挑選三千名司屬官與巡撫都御
史計議何官可領不拘見任閑住先舉二員開報本
部以憑坐名題請軍選完日備造文冊送部稽考本

部即於附近州縣寄養馬內調取三千匹前赴紫荆關約期兌給一面預行工部合用盔甲器械各處備三千件副兵過京師照名驗給其革任叅將麻祿孫寶緣事叅將麻隆朱雲漢各許帶領家丁隨營立功贖罪至於陝西陳言遊兵既留防秋若再於黃甫川募兵一千不惟緩不及事延綏十分空虛亦當長顧却慮似難別議

一議陝兵賞賚臣等議得陝西遊擊陳言下遊兵一枝忠勇驍健以一當十臣博總督之時往來調度殊得其力所據總督侍郎王忬欲要仍留防秋揆之人

情雖已不堪要之邊計誠為首務體情卹私賞賚之
典似難吝惜合無備行戶部議支帑銀差官運送王
忬處官一員賞銀三兩軍一名賞銀二兩事完造冊
奏繳至於行糧料草俱要給與本色倒死馬匹盔甲
官為破格查處以示憫卹之意候防秋畢日放回休
息明年免其徵調其新到陝兵勞逸不同自難援以
為例

一議宣大入衛兵馬臣等議得宣大入衛兵馬大同
則遊擊胡吉宣府則遊擊楊世臣名雖三千其實不
滿一千之數至於有馬者不及二三百名狼藉至極

所據總督侍郎王忬欲要各令補足三千無非責實
欵以飭邊政之意合無聽本部差去司官會同宣大
鎮巡官并守巡兵備官卽於各營挑選精銳轉付二
營務足三千之數開造文冊送部稽考

一議保定入衛兵馬臣等議得保定入衛兵馬例該
民兵一枝遊兵二枝軍門標下兵一千共一萬人大
率不堪卽如近日總兵李賢領兵應援行至良鄉步
軍挑擔盔甲不成行伍馬匹瘡癩羸瘦倒死相望卽
目薊鎮虜患方殷既難減調必須嚴加整飭合無備
行巡撫都御史艾希淳會同總兵官李賢督同井陘

易州大名三兵備道逐一揀選務要人馬強壯聽總督侍郎王忬臨期徵調兵過涿州本部選差司屬官一員前去查點中間如有應處事情巡撫都御史及早奏請其餘留守本鎮人馬亦當徑自簡閱毋恃其不來恃吾有以待之可也

一議遼東總兵馬臣等議得遼東地方止是防冬防春全不防秋以故七月八月九月虜患不在遼廣而在寧前臣博總督之時已嘗題奉

俞旨將該鎮總兵官調住寧前地方一遇冷口喜峰有警不必再候明文星馳會合剿兵截殺無警則聲勢相

倚有警則紆急足恃兩爲有益合無自七月初一日
爲始仍令總兵官殷尚質統領正兵專住寧前一帶
一面差人於冷口探聽果有的警徑自入關應援合
用糧料草米巡撫都御史蘇志皋會行遼東管糧郎
中并分巡遼海東寧道預處不致臨期缺乏有誤軍
餉

一議山西遊兵臣等議得山西地方相去薊州委爲
隔遠其老營堡與北樓口遊兵二枝即如今春調援
薊鎮不速進則不能及虜徒疲士馬若速進則千里
兼程法蹶上將進退無益誠如巡撫都御史王崇所

論合無從臣定議將老營堡北樓口遊兵二枝止在本鎮利器以馬一以防守本鎮一以應援紫荆以後薊鎮有警不必遠來策應

一議居庸峽口臣等議得居庸裏口如橫嶺鎮邊火石嶺唐兒莊等處或原無牆塹或有牆不堪萬一醜虜自懷來樹突而來越過鎮邊長峪即係鞏華昌平地方事之可慮不減古北合無備行巡撫都御史吳嘉會副總兵祝福僉事馬珮叅將張堅趙今閑暇一面徑自脩葺一面將合動官銀合脩工程詳議具奏總督侍郎臣

忭仍要往來督視其口裏城垣堡寨傾

圯甚多酌量緩急以次整頓不得有誤防秋

一議居庸外口臣等議得居庸關外自懷來大山口
逶迤起伏至隆永抵四海冶共界花鎮接界鎮南墩止
俱係屏蔽京師拱護

陵寢重地去歲雨水異常一切阨塞衝塌殆盡趁今閑暇
正當整頓之時所據都御史劉廷臣欲將西路修邊
銀四萬兩內動支一萬八千九百九十兩委官折放
糧米并塩菜等項支用專一修理前項邊隘以後照
數具奏請補隨該臣等會同戶部尚書方鈍等議得
中間處分俱已周悉合無悉依所擬備行劉廷臣并

總兵官歐陽安督同該路叅守等官將本路見在無馬并所在按伏守口及鎮城各管衛無馬雜役等項官軍通行查出委官管領分派工程丈尺如法脩築工完聽巡按御史閱視明白將修過工程動過銀兩造冊奏繳効勞誤事人員分別處置以後薊兵謹守內口宣兵謹守外口同心併力庶爲有濟但惟此等事情必須劉廷臣與僉事朱笈親往懷來隆慶悉心綜理總督尚書許論加意督併本部仍差司屬官一員前去不時體勘方臻實効不然轉盼防秋未免又致誤事

一議紫荆諸口臣等議得紫荆倒馬諸關馬水金水白石諸口先該臣博總督之時題奉

俞旨給發官銀脩理即今尚未就緒若使古北鎮邊一帶防禦謹嚴賊必西窺諸口無疑萬一潰口而入京師未免震動即日融和正當動工之時合無備行都御史艾希淳督同副使程紳俞憲作速修理務要牢實堅固足堪保障艾希淳仍要暫住易州或保定府躬親督視工完查照原行事理造冊奏繳不得直至秋近方云某事不備某工未完藉口免咎致誤大事一議各處廢關臣等議得廢關將官臣博總督之時

題奉

俞旨止將所屬三鎮者取赴軍門聽用于時每一隘口各
委一員領兵擺守已有成效但人數有限地方廣遠
相應博取以備任使合無通行延綏山西大同宣府
遼東保定并在京營衛但係廢將不拘充軍立功爲
民閑住等項在京者聽本部在外者聽各該巡撫都
御史選送薊遼軍門從宜委用合用廩給并家丁口
糧馬匹料草照例支給有功具奏陞賞仍酌量錄用
以示激勸

一議獨石哨探等議得賊犯薊州必由宣府獨石

大山塋等處若使衆將果能加意哨探虜情預知所
關不淺所謂大同得其情宣府徂討其形者是已合無
備行巡撫都御史劉廷臣總兵官陽安嚴行獨石叅
將張縉選差的當人役不必拘於一處多方哨探但
有重大踪跡一面飛報本部一面飛報薊鎮如果哨
報明的薊鎮保全無虞獨石叅將照依軍功陞賞夜
不收人等陞一級仍賞銀二十兩如失於哨報致誤
機宜叅將聽臣等查叅從重治罪夜不收人等宣大
總督拏至軍門各以軍法從事

一議處遼東土兵臣等議得遼東土兵馬多半調援薊

鎮而本鎮土兵慣戰可用臣博總督之時已嘗會同
巡撫都御史蘇志臯具奏工部欲各給以盔甲器械
令其家自爲守人自爲戰該部亦無事例遂竟停廢
此事不費斗糧坐收無限之兵極爲急務合無仍行
蘇志臯會同巡按御史陳瓚督同守巡兵備等官將
前項土兵逐一查出籍名在官不必輕易調動令其
各守本堡有功與官軍一體陞賞隨處皆兵可使制
挺鞭撻夷虜不必全藉軍器事宗將選過姓名造冊
送部稽考

一議總督責任臣等議得今歲見調并存留邊兵且

無言保定并主兵即如陝兵五枝該一萬五千名邊
兵三枝及總兵官殷尚質一枝并軍門標下一千該
一萬三千名大同新添一枝該三千名宣大遊兵二
枝該六千名通計三萬七千名先年提督衙門自分
彼此不曰專守京師則曰專守

陵寢不知謹守關隘正爲京師

陵寢豈有邊關既潰提督獨能拒戰之理況今趙卿素負
清勇正當與王忬同心報

國共濟邊猷合無申明提督

勅諭一應兵馬悉聽王忬調遣其宣大遊兵二枝應在關

外關內亦聽王忬臨期的處庶幾臂指可使氣脉相通

覆兩廣提督侍郎鮑象賢等軍功陞賞疏

題爲擒獲海洋強賊類報功次事職方清吏司案呈奉本部送兵科抄出提督兩廣軍務兼理巡撫兵部右侍郎兼都察院右僉都御史鮑象賢鎮守兩廣地方總兵官征蠻將軍定西侯蔣傳題俱奉

聖旨兵部知道欽此欽遵通抄送司卷查先爲勦除積年稔惡劇賊等事該提督兩廣軍務兵部右侍郎應檟等題該本部覆題

旨這劇寇勦平各官効有勞績應櫝廕一子送監讀書
與領蒙各賞銀四十兩紵絲二表裏茅坤陞二級王寵
鍾坤秀各陞一級朱昇賞銀十兩張謙陞一級致仕吳
通照例給與其餘依擬行欽此俱經通行欽遵去後今
該前因查呈到部看得提督侍郎鮑象賢等題稱劇
賊徐銓方武陳時傑謝明陳權等俱係勦敗賊首何
亞八等同黨大賊首王五峰等分枝糾合倭夷縱橫
海上陳文伯李明貴等乘機崛起嘯聚猖獗各該官
兵前後擒斬通計一千二百餘名顆瀨海之濱頗稱
安靖及稱副使汪栢僉事杜璵經彥宋尤瑛叅議王

宗沐叅將張裕鍾坤秀調度防禦多方統督指揮黑
孟陽王沛原任備倭蔡禎督戰身先屢收奇績通判
汪應奎知縣方攸騏招撫脅從兩擒突寇俱當優錄
布政使王鈺張元冲知府謝彬羅一鸞張子弘料理
軍餉區畫兵防所當通敘乞要查議陞賞又稱黑孟
陽先該巡按御史王紹元叅劾提問事出風聞仍要
免提復其原任又該鮑象賢蔣傳各題稱慶遠地方
阜嶺坂荒龍樓東甌南鄉等村首賊黃父將藍强王
黃千二韋公敦等刦奪府庫挖塚盜屍阻截江道鈎
刦船隻積年賊躋糾窩前黨攻打鄉村燒屋殺人縱

橫荼毒禍淫一方隨委分守右叅議陳善原任柳慶
等處叅將戚振及調東蘭州土官男韋起雲各統領
軍兵直搗巢穴各能遵令奮勇擒斬賊級共四百五
十七名顆醜類殲滅地方安靖江道疏通及稱陳善
戚振紀律嚴明綜理詳慎土官男韋起雲繼承職業
今又獲有前功給與實授官職以勵人心各一節爲
照劇賊徐銓方武等本以華人乃敢悖逆

天道勾引倭奴流毒海方罪不容誅各官同心戮力以次
勦滅前後擒斬一千二百有奇雖係大賊王五峯等
餘黨要之皆爲地方巨患至於廣西慶遠之捷又擒

斬賊級四百五十七名顆一併計之則一千六百有奇此誠兩廣少見之事所據提督軍務右侍郎鮑象賢鎮守兩廣定西侯蔣傳綜理有方調度得策群兇授首悉由經理之功二省輯寧咸賴發蹤之略此之提督應禎近年之功多而且奇相應優論副使汪栢叅議陳善叅將戚振僉事杜聰經彥宋允瑛叅議王宗沐叅將張裕鍾坤秀指揮使黑孟陽指揮同知王沛署都指揮僉事蔡禎通判汪應奎知縣方攸濟上官男韋起雲督戰撫處屢成俘斬相應首論內汪栢陳善戚振韋起雲功尤懋著黑孟陽等

旨提問俱難柴議布政使王鈐張元冲知府謝彬羅一鸞
張子弘軍計兵餉均有裨益相應次論齎奏指揮陶
金百戶吳通郭中秦錄服有勤勞亦應併論既經巡
按御史郭文周李一經覈勘明實係干激勸委當通
行敘論合候

命下將鮑象賢厚加廕賚蔣傳厚加陞賞汪栢陳善感振
量加陞賞杜璵經彥來允瑛王宗沐汪應奎方攸躋
各陞俸一級張裕鍾坤秀王沛蔡禎各陞署職一級
黑孟陽免提仍復原任王鈐張元冲謝彬羅一鸞張
子弘量加賞賚陶金吳通郭中秦錄照例給賞韋起

雲谷行吏部再加查議如果相應免其赴京就彼准
與該州署知州職事其餘有功人員查照數冊另行
具奏嘉靖三十四年四月十八日題奉

聖旨這擒獲海賊功次鮑象賢廕一子入監讀書蔣傳加
太子太保還各賞銀三十兩紵絲二表裏汪栢等各陞
一級杜璵等各陞俸一級張裕等各陞署職一級黑盞
陽免提准復原任王鈺等各賞銀十兩其餘依擬欽此
覆蘇松巡按御史周如斗條陳海防疏

題爲議處海防以固重地以圖久安事職方清吏司茶
呈奉本部送戶科抄出巡按直隸監察御史周如斗

題奉

聖旨該部知道欽此欽遵抄出送司案呈到部看得巡按
直隸監察御史周如斗因蘇松等處倭寇爲患奏處
四事均於防倭有益合就開立前件議擬上請伏乞
聖明裁定嘉靖三十四年四月二十三日題奉

聖旨准議欽此

一會勦以取全勝臣等看得蘇松嘉湖壤地相接倭
奴一出乎此即入乎彼事同輔車形若唇齒其一應
戰守機宜全在同心協力聲勢相倚近日設立總督
大臣居中調度正是收渙合離以一事權之意若使

浙西兵備叅將等官聽南直隸撫按節制南直隸海防備倭等官聽浙江撫按節制未免政出多門萬一意見不同反爲兵家所忌合無備行總督張經會行南直隸浙江巡撫都御史嚴飭各該兵備海防副總兵叅將等官各照信地防守如應該會勦務要相度時宜互相聯絡寇退毋徒逐之出境務追至其不可追之地寇至毋徒截之使不入吾境務截其所俱當截之路悉如所議施行如敢仍前自分彼此致悞軍機聽巡按衙門指名叅奏

一嚴令以飭軍旅臣等看得旗牌之設所以肅軍令

而嚴紀律上仗天威下一衆志關係甚重是故總督提督總兵并領兵將官得而有之雖巡撫都御史亦未嘗輕給若將旗牌寄之文臣每兵一枝設一文臣監之似於舊例有碍但政責任人不專任法即如吳江之戰任環以周琬之令遂能轉敗爲勝豈有責任重大如總督者反不能行是特在於一振汛之間耳合無備行總督張經以後務要威愛相濟平時操練嚴整軍法如有臨陣退縮不肯用命者遵照

勅諭即以軍法從事必使官軍畏我而不畏敵方克有濟其中論功行賞事宜大率當自賤罰當自貴之意

悉如所議施行

一慎守以固海防臣等看得防中貴於周密分布在
據要害所據本官奏稱前因誠為得其肯綮合無備
行總督張經及各該撫操等官趁今兵力四集之時
一面相機征剿以圖殄滅一面審度地利於金山青
村南匯一帶嚴行脩復營寨團堡不得徒為文具其
餘巡行防禦住劄夾擊糾察等項事宜事在彼中悉
聽各官從宜施行

一足兵以充武備臣等看得本官題稱前事大意謂
由前則土兵之盛緩急獲濟由後則軍伍之充永遠

有賴無非激勸人心掃蕩妖氛之意除改編軍伍先
該本部題奉

欽依以彼不許比例改編以杜窺避難以別議及查舉人
監生吏承耆民人等殺賊獲功本部會同吏部另議
外其腹裏各縣照例徵銀解發沿海縣分雇募沿海
之民令清軍同知等官常川操練相機剿禦一節不
知人情事體有無便利合無備行總督張經會同彼
處撫按官徑自酌處一面移咨本部查考

會議征倭賞格疏

題爲懇乞

聖明定立賞格以平倭患事先該兵部題職方清吏司案呈照得倭寇賞格節經都御史王忬等建議覆奉

欽依但中間如致仕官舉人監生生員及軍民人等獲有

功級者尚多議處未詳呈乞施行等因案呈到部臣

等看得江南財賦與西北戎馬相爲表裏故財賦充

則戎馬精強財賦缺則戎馬削弱外之攘却與內之

安戢互爲依輔外攘則內自奠安外擾則內難底寧

譬之人之一身耳目手足缺一不可乃今倭奴無狀

騷動南服即如浙江江南直隸等處城郭半爲丘墟田

畝多成草萊誠爲腹心之災不止門庭之寇二三年

間雖稱決戰原無可戰之兵以故彼酋任意縱橫全
無歸意兼之中國無賴之人爲之嚮導爲之爪牙禍
同火燃未見熯滅之期臣等一念至此誓不與賊共
戴天日所幸狼兵土兵漸次調集地方鄉兵以父兄
子弟之讐忿心切齒各求一戰今日急務全在申明
賞罰除明罰勅法總督軍門自當遵照

諭施行外所據營効一事必須賞不踰時人心方知激
勸臣等議得文職如致仕官監生生員吏承陰醫人
等下至小民武職如小旗總旗百戶千戶指揮都指
揮人等下至軍舍但能獲有倭効者即與甄錄吏兵

兩部各印發空名劄付五百張各置號簿一扇馬上
差人交與總督軍務右都御史張經收貯聽其酌量
功次定擬官職填註劄付之內一面用印鈐蓋一面
挨次附簿其劄付有功之人執赴該部即與選用所
據賞格行准吏部咨議前來理合開坐上

請但事體重大臣等不敢定擬伏乞

聖明俯賜裁允勅下遵行地方幸甚等因題奉

聖旨目今狼兵土兵調集數多費用糧餉不貲各官正宜
設法併力勦賊這所擬雖是破格懸賞但處置未善恐
致誣殺冒功反滋弊端你每還會同吏部都察院吏兵

二科從長詳計來說欽此欽遵抄出到部臣等會同太子少保吏部尚書兼翰林院學士臣李默等都察院左都御史臣周延等吏科都給事中臣謝登之等兵科都給事中臣本丁用敬等議得用兵之要莫先於賞罰激勸之機尤貴於明信故曰賞當其功又曰賞不喻時是雖兵家常談自古聖王磨世礪鈍要之不能外此自有倭患以來地方當事之臣率多彌文以免罪規報以邀功退縮以苟全暗劣以失計以致彼夷狂悖任意縱橫上勞

聖皇宵旰之懷下重生靈荼毒之慘江南之民肝腦塗地

者二三年矣先該臣博等以兵力雖集兵威未振狼
兵土兵其勢既難久留者民鄉兵其志似猶未叶必
須振勵人心方能立收群醜且查得總督張經巡按
御史周如斗先後建白俱以懸賞爲言二臣親在地
方見之既真言之頗詳以故咨於吏部臣默等首議
文職賞格歷檢舊章臣博等次議武職賞格又以事
體重大不敢定擬恭請 宸斷荷蒙

皇上聖神文武洞燭微宜惟恐直禡之失實反致勸懲之
無據 勅下臣等從長詳計臣等愚昧實所不及臣
等竊惟一法既立一弊自生大而殺降小而冒功不

止南方爲然但係用兵去處俱有此弊是以

祖宗舊制責差科道官或就令巡按御史紀功正所以舉

正欺罔革除奸蠹况今南直隸浙江巡按奉有專

勅紀嚴功罪地方公論昭如日月豈有欺蔽不惟不敢不

糾自亦不忍不糾振肅綱紀嚴明功賞此其領要臣

等謹將原議文職武職賞格查據舊典參酌時宜逐

一申明開坐上請伏乞

勅下總督軍務右都御史張經巡撫浙江應天右僉都御

史周琬李天寵各要協心併力早靖妖氛以慰我

皇上南顧之憂如或徇情行私不能殄滅賊寇反致賊寇

之滋蔓不能激勵人心反致人心之解體但有買功賣功并殺降情弊聽巡按御史從實糾論

國典具存自難輕貸其吏兵二部空頭劄付不必印給止令獲功之人赴巡按衙門紀驗明白備云賞格給與印信執照免再覈勘庶法行自近法立而人知守政出於一人存而政自脩地方幸甚嘉靖三十四年四月二十五日會題奉

聖旨目今正在用兵進勦這所議待報另行欽此

一吏部文職合無斟酌節年邊功事例今後如舉人監生斬獲真正倭賊首級一顆係依親者免其坐監

歷事就與上選已上選者即許起送聽選其斬獲三
顆以上者仍於本等資格外官內優等敘用願京職
者不拘品級照考定次第銓授其承差斬獲首級三
顆以上聽缺者免其在外歷役起送赴部辦事見役
者起送赴部免其辦事即與選用其吏農斬獲首級
三顆以上候缺者免其一考二考起送赴部免其辦
事就撥當該見役者不論一考二考起送赴部免其
辦事當該照例考試上選其省祭官選期尚遠未奉
行取者即許起送赴部聽選已行取者即與選用俱
於本等資格上加陞一級其陰醫等官斬獲首級三

顆以上量加品官服色仍取一子充附學生員其各
罷閑官員若能斬獲首級三顆以上爲民閑住者與
致仕係致仕者於原職上加陞一級照舊致仕仍各
取一子充增廣生員以上各該人員如獲功及數而
不願前項陞用并不及數者聽照軍職陞級事例陞
賞如舉人監生部下獲功與擒斬隨從強賊并陣亡
者俱照兵部議定賞格事例施行中間如有謀勇出
群能擒斬船主渠魁及大夥頭目聽總督官奏報到
日另議超格題請陞賞

一兵部武職查得倭功近已題 准照依邊功事例

陞級世襲合無斟酌節年事例今後小旗總旗百戶
千戶指揮及軍舍餘丁并沿海耆民人等斬獲真正
倭賊首級一顆俱陞一級世襲不願陞者賞銀五十
兩擒斬隨從強賊三名顆并陣亡者亦陞一級世襲
如不係對敵止是緝捕三名者照依舊例陞一級不
准世襲不及三名者給賞副總兵部下得功二百顆
以上叅將都指揮部下一百五十顆以上把總指揮
部下六十顆以上千百戶部下二十顆以上皆得陞
級中間如有謀勇出衆能擒斬船主渠魁及大夥頭
目聽總督官奏報至日另議超格題請陞賞

覆薊遼總督侍郎王忬條陳防秋事宜疏

題爲議處防秋事宜以備戰守事職方清吏司案呈奉本部送兵科抄出總督薊遼保定等處軍務兼理糧餉兵部左侍郎兼都察院右副都御史王忬題奉

聖旨兵部知道欽此抄出送司案呈到部臣等看得總督薊遼侍郎王忬題稱防秋事宜俱中肯綮合就開立前件議擬上請恭候 命下備咨王忬等欽遵施行
嘉靖三十四年五月初三日題奉

聖旨是欽此

一列戍守臣等看得倚牆拒守事半功倍遼東自有

節年成規難以別議薊保二鎮東起山海西止故關
延袤二千餘里一處失守與無守同委當廣集兵馬
逐區嚴備合無備行王忬如議施行其大同新選兵
馬三千仍聽本部明文徵調但兵難遙度機難預定
未盡事宜聽其臨時徑自調度不必拘於原議

一聽權駐臣等看得冷口喜峰諸隘俱在東區且係
屬夷入貢大路以故先年巡撫衙門設於遵化近日
改駐薊州相去頗遠平時鼓輯之寄臨警決斷之權
委無所屬合無將巡撫照舊改居遵化防秋時月遵
奉明旨仍住昌平恭護

陵寢京師如果居庸無警古北有警聽其往來調度其餘
事宜悉如王忬所議施行

一據險要臣等看得薊保宣大勢如唇齒彼此協力
拒守非爲本鎮全爲京師

陵寢以故王忬謂有地在宣大而險在內者則應移宣大
之兵併守於內有地在薊保而險在外者則應移薊
保之兵併守於外似亦得其要領但止言大略未見
料理之詳况本官自謂容臣查明形便徑自移咨區
處合無通行許論王忬會議停當徑自具奏

一專責成臣等看得不惜勞費遠調客兵正欲藉其

敵懷之力若使窺避逆謀誠為無益有損王忬欲將
客兵縱賊入邊與本鎮官同罪遇有功次比照本鎮
官陞賞每加一等論之切中其弊處之甚得其法合
無備行本官悉如所議施行

一張兵聲臣等看得變當預圖兵貴先聲徵調遼東
兵馬與本鎮兵馬六月中旬興道出邊同時耀武誠
伐謀之上策臣博去歲亦嘗行之但事當待重合無
止在本邊適中去處劄營分練屬夷耳目極多自能
傳布虜營不必遠出邊外致有別虞

一撫屬夷臣等看得三衛屬夷自來為我藩籬耳目

所寄關係不輕近日與虜或結為婚姻或為之嚮導
跡雖可駭情非得已王忬所議可謂深得治以不治
之法合無悉如本官所議施行其撫夷錢糧臣博在
鎮時已親見其缺乏之甚聽巡撫官作速具奏該部
早為處給

議宣府陣亡叅將李光啓等卹典疏

題為賊虜犯邊損折將領殺傷官軍乞

賜究治悞事臣工以振邊境事職方清吏司案呈該巡按
直隸監察御史李鳳毛題稱達賊侵犯宣府青邊口
堡叅將李光啓等對敵陣亡該本部覆題節奉

聖旨李光啓等應得卹典查例來看欽此查得本年三月
內爲邊臣怠玩縱賊入境損折將領殘害地方懇乞
天威速加究治事該巡按直隸監察御史龐俊等題稱達
賊侵犯薊鎮寬佃峪地方欲要將陣亡叅將趙傾葵
查照先年山西叅將張世忠事例贈謚建祠錄廕千
總李湘褚文明等厚加襲陞等因該本部覆題奉
聖旨趙傾葵力戰陣亡准贈都督同知仍廕一子爲副千
戶世襲李湘等贈官加襲立祠都准擬行欽此通查案
呈到部臣等看得各邊將官每遇虜至不過嬰城以
自保結營以苟全及至虜退又多彌文以免罪妄報

以邀功習以成風不可救藥今據宣府中路叅將李
光啓早閑將略夙負雄名耳聞羽檄輒跨馬以先登
身陷重圍猶揮戈而力戰忠勇著聞首當優錄操守
黃添祥把總王永始終全敵愾之節千總尚直併伊
男尚志父子奮結纓之義其忠均不可泯仰蒙

聖明在上以事干激勸特命臣等將應得卹典查例來看
臣等謹查得李光啓比與叅將趙傾葵黃添祥等比
與千總李湘等事例委果相同合候

命下將李光啓優贈一官另廕一子爲副千戶世襲仍立
祠死所歲時祭祀操守指揮黃添祥千總指揮尚直

俱贈都指揮僉事與把總王永行各該衛所將應襲
兒男保送赴部各於祖職上加陞三級世襲舍人尚
志原未授職合無量贈一官俱附入李光啓祠內配
享以爲邊臣死事者之勸王永止開把總不知是指
揮或千戶難議贈官併其餘開報未盡人員通聽巡
按御史查覈至日另行具奏嘉靖三十四年五月十
二日題奉

聖旨李光啓贈都督同知仍廕一子爲正千戶世襲黃添
祥等贈官加廕併立祠都依擬行尚志贈指揮僉事准
附祀欽此

條議平倭方略責成督撫等官疏

題為申議南倭事宜以勵人心以圖後效事職方清吏司案呈照得南直隸浙江倭患方殷總督叅將等官近已易置正軍務更新之會浙江之平望小醜雖除松江之柘林故巢尚在所有應行事宜呈乞議處案呈到部臣等看得自有倭患以來我

皇上矜憫元元日勤宵旰躬叩上玄遣祭東海

神謀淵慮風動南服至於選將調兵寬征懸賞凡所以為安攘計者靡事不周靡思不到奉

命征討之臣理當不憚勤勞不遑夙夜汎掃妖氛以慰

上心以荅群望乃今金山之衄遠近震駭我兵遲回太甚
方議會勦賊即出我不意殊死以戰在賊則爲先則
制人在我則犯爲人所制之戒麥田伏兵忽然衝突
我兵哨報全踈墮其術中在賊則爲多方誤之在我
則犯先爲不可勝之戒漳兵不戰而却狼兵戰而失
利奪我盔甲因而被執在我則主客不協以勞待逸
在賊則奇正並用變客爲主屢失機宜言之可恨伏
蒙

聖明在上洞燭其情將總督張經叅將湯克寬扭解赴京
副總兵俞大猷褫奪其職威若雷霆恩同覆幬蠢爾

鯨鯢自當立見夷滅東南生靈不勝幸甚臣等切惟
琴瑟不調甚者必解而更張之難以膠柱總督周琬
新承簡命正矢心圖報之秋除用兵機宜事在閫
外臣等難以遙制至於紀綱兵食帥臣所不敢專者
謹用條爲六事上塵天聽伏望

皇上俯賜採覽勅下遵行臣等不任惶悚俟

命之至嘉靖三十四年五月十八日題奉

聖旨這所議都准行欽此

一軍之命係於主將今之總督即其人也上仗

天威下一衆志全在紀律嚴明使兵畏

而不畏敵方能

成功試觀近日舉動因循姑息一無可觀若以事體
掣肘人心懈弛爲詞不知吳江之戰兵備任環以巡
撫之令即能轉敗爲勝政貴任人不專任法是誠在
於一振汎之間耳周琬既奉 新命務要欽遵

果有阻撓軍機不用命者即以軍法從事毋牽於情
毋怵於勢毋惑於浮言毋徂於已見蒞事之初精采
百倍庶幾可以收拾人心決勝夷裔

一狼兵頃雖少衄大衆尚在自古用兵兵識將意將
識士情未有主客扞格可以建功立業者俞大猷兼
統狼兵誠爲失策之甚至於湖廣土兵似亦漫無統

紀查得總兵官沈希儀副總兵何卿俱素負重望乃使僅領數百家丁隨行逐隊殊非委任責成之義合無將沈希儀何卿各以原職請勅一道沈希儀專領廣兵岑大祿岑大壽白汝鄒繼芳等悉屬管攝何卿專領湖兵彭蓋臣彭翼南等悉屬管攝與巡撫官會同行事仍聽總督節制總督相度賊勢不拘南直隸江南江北并浙江地方責令二臣互相應援畫地以守一切陸戰盡以付之有功陞賞誤事黜罰如沈希儀何卿未到總督從宜調度不必拘泥副總兵俞大猷查照原擬責任專管水戰項者賊自海洋而來

未見大猷略展一籌此乃收功桑榆之時如仍前玩愒國典具在難以輕貸其餘主兵悉聽總督徑白酌處務中肯綮不許再誤

一政不在兵而在於將兵不貴多而貴於精即今各處調到客兵似亦不少止緣常事之臣全無紀律上下解體若使綱紀不明法令不行雖百萬之兵何濟於事巡按御史胡宗憲欲要廣調精兵博選大將前來策應無非欲圖萬全之意令無聽總督周琬會集各官即查兩廣再有何項官兵一面徑自徵調選委本處將官不拘見任閑住從宜委用本部仍移文兩

廣提督官不許占恠阻撓致誤軍機周琬仍明諭瓦氏以爲汝等世官厚祿

國恩當報近日父兄子弟親戚爲賊所陷私讐當復部下果有報效之人不拘數目徑許添調前來戮力平賊合用衣糧官爲處給不必自備

一金山之衄節據總督撫按官開稱被賊敵敗又云彼此各有殺傷又云頭目鍾富輕出陣亡地方官員止知畏罪隱匿不知各該官軍敵愾之忠係于激勸難以輕泯合無將鍾富聽總督官先給棺斂銀二十兩應得卹典作速議奏其餘陣亡係客兵者給銀三

兩主兵者給銀二兩少見弔死問孤之義事完將用過銀兩給過姓名造冊奏繳撫按官仍於死所親爲致祭以慰幽魂

一調到客兵或金山一戰而告衄或嘉興屢戰而告捷僅可以爲目前之圖久之則師老財匱不可爲常至於本處土兵咸謂柔脆難用不知吳越之兵昔人常以之橫行天下號爲慄悍誠使得轉弱爲強之勢乘因敗爲功之機責成知府知州知縣團結教習漸成精銳家自爲戰可以消其從賊之心人自爲守可以爲我敵愾之用無論往事即如樂陵小縣知縣許

達一加整飭勁兵雲集流賊瓦解何嘗遠借客兵此事屢經諸臣建白本部覆議日復一日竟無實效凡以總督官督責之未至耳周琬務要刻意舉行至於祖宗海防舊制亦當以次脩復毋為一時之計當為千百
年永圖

一師行糧從軍中首務故餉缺則無以為養兵之費兵少則無以為制賊之具總督張經欲要行令鄰省協濟廣東布政司支板木軍餉銀二十萬福建布政司支堪動銀十萬江西湖廣二布政司查見在銀兩盈縮之數量為支解似亦勢不容已合無聽戶部導

奉 明旨會同臣等作速計議此外再有何項錢糧
可以動支一併查處具奏

覆陝西總督都御史賈應春勘議三鎮脩邊疏

題爲欽奉 聖諭事職方清吏司案呈奉本部送兵科
抄出總督陝西三邊軍務都察院右都御史兼兵部
右侍郎賈應春題奉

聖旨兵部知道欽此欽遵抄出送司卷查原行事理相同
案呈到部看得總督陝西三邊軍務右都御史賈應
春題稱大意謂延綏西路邊牆自定邊營瓦楂梁墩
起至龍州城止實該築牆三百一十一里有零嘉靖

二十九年脩完三十餘里以後因各鎮兵馬挑殘停工未脩欲要審度時勢酌量定擬各一節爲照前項邊牆之脩非爲延緩寔爲全陝保障欲止則前工盡棄欲速則勢不能達總督曾應春謂年歲之豐凶不可預期邊境之寧否不可預料兵夫之多寡不可預派做工之時月不可預期嚴行陝西延緩寧夏鎮巡官悉照原議協心共理務期三四年間完此大工巡撫王輪謂天下之事以漸則積成土工之舉尅期則激衆風雨陰晴不可必者天之時逃亡疾病不能齊者人之力烏驚雲散難以度者虜之情二臣之言委

曲詳盡臣等無容別議合候

命下備行總督賈應春并都御史唐時英王輪王夢弼
未完邊牆及時脩築不許自分彼此毋爲一鎮之圖
當爲三鎮之計不許徒事靡文毋爲一時之圖當爲
百年之計錢糧人工及添築柳樹澗喁口二堡并其
餘事宜悉如今議施行每年開總督官具完過工程
支過錢糧數目開坐奏聞本部照依薊鎮脩邊事例
議擬上請行巡按御史即行查勘得尺則尺得寸則
寸如果有益地方雖三四年內完報亦不爲遲三鎮
巡撫都御史如敢互相矛盾致誤邊務聽總督官先

行舉奏嘉靖三十四年五月十九日題奉

聖旨是欽此

覆工部侍郎趙文華論湖兵有功行賞疏

題為急報大捷事職方清吏司案呈奉本部送兵科抄

出工部右侍郎趙文華題奉

聖旨兵部知道欽此抄出送司案呈到部臣等看得前項

嘉興之捷即金山突入之賊仰仗

聖皇在上誠感玄穹威如震電斬獲倭首一千數百有奇

兵備任環又於常熟縣地方斬獲一百二十餘顆生

擒一名燒燬倭船二十七隻東南生靈戴

天恩不勝幸甚但在浙江則餘黨之流遁猶未盡除在松江則舊巢之元兇居然尚在即今兵威稍揚人心正奮相應乘勝逐北以靖地方合候

下本部馬上差人齎文交與總督侍郎周琬巡撫都御史李天寵等務要相量機宜將率官兵痛加剿殺以雪神人之忿不得徂於一勝怠玩廢弛致棄前功及照去歲古北之後荷蒙

聖慈軫念將兵特頒賞犒一時人心感奮竟成拒虜之功臣博於時待罪地方目擊其事真鼓舞群情之大機所據侍郎趙文華御史胡宗憲協忠效勞已蒙

恩賚合無將各該有功客兵永順宣慰彭翼南保靖宣慰
彭蓋臣統領狼兵遊擊鄒繼芳保靖官生彭守忠先
行獎賞其東蘭那地南丹歸順四州領兵頭目聽總
督官從重犒賞嘉靖三十四年五月二十一日題奉
聖旨是彭翼南等各賞銀二十兩紵絲二表裡欽此

覆工部侍郎趙文華論總督侍郎周琬等功罪疏
題爲續報軍情事職方清吏司案呈奉本部送兵科抄
出工部右侍郎趙文華題奉

聖旨兵部叅看了來說欽此抄出送司案呈到部臣等看
得工部右侍郎趙文華具題前因論倭奴強弱之形

陳諸臣欺懦之罪述湖兵鏖戰之勇薦御史忠智之
賢殊無粉飾之詞深得察視之體除叅將湯克寬已
經拏問宣慰彭翼南彭蓋臣先蒙

恩賚俱難別議外叅照總理糧儲提督軍務兼巡撫應天
等府地方都察院右僉都御史今陞總督軍務兵部
右侍郎周琬攘功冒賞玩寇殃民率意分兵立致搗
巢之無據甘心擁衆坐令餘孽之復張統領狼兵遊
擊將軍白法有金山戍守之責無鐵馬先登之志始
而銳士突出全乏振勵既而零賊奔潰太失機宜蘇
松游防僉事董邦政叨陞憲職苦無軍功六合之道

避跡涉畏難二千之隱匿情屬欺蔽以上三臣職任雖各不同誤事均爲有罪但白嘉興告捷之後兵威已揚人心正奮且周琬新承簡命見奉

明旨令其運謀督將大加剿滅似應使過以責效伏望皇上將周琬白泫董邦政先行革職戴罪平賊惟復拏解究問其御史胡宗憲效忠宣力荷蒙

特賞聽其糾察諸臣早成掃蕩之功以報

聖恩以靖地方吏部遇有相應員缺仍即不次擢用嘉靖三十四年五月二十八日題奉

聖旨周琬統領重兵不能擒斬逸賊致折將官好生玩法

本都當拏問但念用人緊急周琬姑住了俸白汝董邦政革去職級充爲事官都著戴罪殺賊如再怠縱不宥胡宗憲候論功之日不次擢用他趙文華著照前旨竭忠督討各官誤事的務要從實叅來勿畏避欽此

覆監察御史金淞論浙直等處功罪督責疏

題爲倭寇臨城萬分危急等事職方清吏司案呈奉本部送兵科抄出巡按直隸監察御史金淞題奉

聖旨兵部知道欽此欽遵抄出送司案呈到部看得巡按直隸監察御史金淞具題前因大率通論浙江南直隸獲功失事之詳中間如平望之捷甬聞而婁門之

警隨報將兵之勇方銳而遊擊之軀已殞以火攻而
反貽自焚之禍以水攻而或致胥溺之危舊賊未平
新賊日至東南之事不勝可憂聞見真切敷陳明備
即今總督巡撫方承簡命狼兵湖兵已久調集

天語之叮嚀至再至三地方之患害剝床剝膚正當痛加
振飭以收桑榆之功不宜仍復玩愒以取誅夷之罪
除備行總督侍郎周琬巡撫都御史陳儒曹邦輔李
天寵嚴督總兵官沈希儀副總兵何卿統領調到狼
湖官兵副總兵俞大猷統領水兵并各該主客領兵
官員一面於沿海處所嚴加把截勿使新到倭船登

以平劫掠一面直搗舊穴務使倭奴進無所入之途
盡殺戮之慘刻期掃蕩以紓我

皇上南顧之憂嘉靖三十四年六月初七日題奉

聖旨是欽此

題為巡撫延綏都御史王輪請調內兵輪戍本鎮疏
題為極邊重鎮缺兵防守懇乞

天恩俯採愚見以備不虞事職方清吏司案呈奉本部送
兵科抄出巡撫延綏等處地方都察院右僉都御史
王輪題奉

聖旨兵部知道欽此欽遵抄出送司案呈到部看得巡撫

延綏都御史王輪具題前因大意謂本鎮兵馬選調入衛見在兵馬寡少足營軍則城堡失守實城保則營堡踈缺四慧日生機巧時變殷憂內焚思圖善後其一欲選取腹裏之民壯其二欲查調下班之官軍審時度勢皆不容已况陝西地方以延綏爲門戶以八府爲堂室移堂室之人以守門戶委難憚勞惜費相應通行依擬合候

命下移咨總督右都御史賈應春再加酌議如果相應會同延綏都御史王輪陝西都御史唐時英將陝西各府民壯除臨鞏二府外其西鳳等府民壯十分爲率

選取三分督脩器械津貼盤費府委總管官一員每
年六月以後統赴延綏聽候鎮巡官分布守堡十月
放歸其陝西下班官軍俱聽延綏都御史查明數目
亦限六月戌邊領班都司統領十月放歸候入衛官
軍存留本鎮之日二事俱各停止嘉靖三十四年六
月初九日題奉

聖旨是欽此

覆山東撫按官劉采等奏報倭寇防禦疏

題爲飛報倭寇登岸事職方清吏司案呈奉本部送兵
科抄出巡撫山東等處地方都察院右副都御史劉

米巡按山東監察御史雍焯題俱奉

聖旨兵部知道欽此通抄送司案呈到部看得前項倭奴約有百人突至日照縣地方緣山東與南直隸唇齒相連一水之地出彼入此勢所必至決不可以爲偶然之故玩弛忘備及查得山東沿海一帶曠野平原居民鮮少比之江南不同在我則萬馬並馳長技可施在賊則一登於岸短兵無用往年東遼成功具有明效但恐當事之臣循習故常未免重遭惠害相應通行申飭合候

令下備行巡撫都御史劉米嚴督都司守巡兵備等官將

各州縣搶手整編停當差人於海上往來巡哨遇有
賊到如果登岸一面焚燒其船絕其歸路一面會兵
大加剿滅一以安東土之民一以雪商上之憤功成
之日自當破格陞賞如或觀望退縮玩寇誤事
國典具存難以輕貸嘉靖三十四年六月十三日題奉
旨是欽此

覆巡撫應天都御史周琬請兵剿倭疏

題爲舊賊未殄新賊復來擁衆渡浦流劫內地懇乞
天恩亟發精兵大加誅剿以寧地方事職方清吏司案呈
奉本部送兵科抄出總理糧儲提督軍務兼巡撫應

天等處地方都察院右僉都御史周琬題奉

聖旨兵部知道欽此欽遵抄出送司案呈到部看得巡撫

應天等府地方都御史今陞總督軍務兵部右侍郎

周琬具題前因大意謂蘇松地方舊賊未殄新賊復

來擁衆渡浦流劫內地欲要調發水陸官兵一二萬

員名坐委謀勇將官統領及按察司有風力官監督

定與限期兼程前來併力剿賊一節爲照前項倭奴

既稱日益猖獗調兵增餉均不容已先據巡按御史

周如斗崔棟連章具奏已經臣等請調兩廣湖廣四

川等處之兵各委慎戰將官統領并按察司官監督

前進奉有 俞旨別難再議但地方相去隔遠
一時不能卒至若使當事諸臣不以見在之兵運謀
戮力大加剿滅假以等候調兵為詞退縮觀望譬之
積火已燃方行鑿井未免重致悞事相應通行申飭
合候

下備行總督周琬巡撫曹邦輔李天寵陳儒分布主客
官兵儘力戰守何卿浣希儀新奉

初諭專管狼湖之兵二臣素負時名務要大攄籌畫與俞
大猷水陸夾攻共成掃蕩之功決不可坐待新調之
兵搖惑衆心殃民玩寇本部仍一面馬上差人前去

四川湖廣兩廣各督催兵馬起行取具提督談愷巡撫羅廷繡汪大受發過兵數日期具實回奏嘉靖三十四年六月十三日題奉

聖旨是欽此

覆工部侍郎趙文華論湖兵浙直功罪疏

題爲再報軍情事職方清吏司案呈奉本部送兵科抄出工部右侍郎趙文華奏奉

聖旨兵部看了來說欽此抄出送司案呈到部看得工部右侍郎趙文華具奏前因大意謂宣慰彭蓋臣等起効之勤將應鏖等戰之安當事諸臣欺慢之罪

欲將先令所奏通行議擬亟賜恩勞究治一節爲照倭奴之警目前日嘉興之捷言之則當甄錄其功自近日蘇松之衄言之則當區別其罪緣巡按御史覈勘未到且狂賊見在地方尚未寧息一經論功之後別有罪狀難以議處內保靖宣慰使彭蓋臣永順宣慰司摩襲冠帶官舍彭翼南既稱報効之勤似當先行敘論以慰其心永順宣慰彭明輔保靖摩襲生員彭守忠遠發勁兵功亦可錄至於地方當事諸臣如總督張經已經拏問周琬與巡撫李天寵已經革職爲民副總兵俞大猷僉事董邦政等已經革充爲事

官同知都文奎等已經提問趙文華職專視察不知
聖明俱已處分故有此奏况近奉 俞旨易置督撫增添
兵糧申明賞罰宸謀聖慮無不由盡是在當事諸
臣協忠戮力共成汛掃難以遙制合候

命下將彭蓋臣彭明輔賜勅獎勵仍各重加賞賚彭翼南
就與實授彭守忠給與冠帶并其餘諸臣通候事寧
之日查據功罪一併議奏定奪一面備行趙文華悉
心督察仍會同新任總督巡撫等官楊宜曹邦輔明
宗憲并總兵官沈希儀副總兵何卿大加振奮刻期
平賊以慰

皇上南顧之懷其柘林巢穴賊既盡數奔突而出亦要設法先行占據令其退無所歸仍查巢之左右前後如何設伏置陷以誤我師一一得其情實以後用兵庶好調度七團八團等處但有零賊亦須設法鵬剿小戰既利大戰自勇爲事官俞大猷遵奉本部題准事理專管水戰遇有舊賊出洋新賊入境即便相機堵遏如總督撫操等官再致誤事

國典具存難以輕貸本部仍咨都察院轉行彼處巡按御史速查奏內所稱蘇城之寇的係何人以火器火藥委諸賊中乍浦海上福蒼等船七十餘隻緣由被

賊燒燬即將失事不忠人員指名叅奏彭翼南既蒙
特恩益當勉圖報効不可縱容土兵騷擾地方嘉靖三十
四年六月十九日題奉

聖旨是彭蓋臣彭明輔寫勅獎勵還各賞銀二十兩紵絲
一表裡彭翼南准與實授彭守忠給與冠帶福蒼兵船
被燬失事人員著巡按御史從實查明具奏欽此

楊襄毅公本兵疏議卷一終